

摘藻堂四庫全書薈要

史部

欽定四庫全書叢要卷九千九百七十一

史部

經義考卷二百四十二

翰林院檢討朱彝尊撰

羣經

四

宋真宗皇帝十一經詩

二十七章

佚

玉海祥符七年六月庚辰上作周易詩三章七月辛

亥作尚書詩三章八月庚午作春秋詩三章九月甲
申作毛詩詩三章庚戌作周禮詩三章十月甲戌作
儀禮詩三章十二月庚辰作公羊詩三章八年正月
丁未作穀梁詩三章閏六月癸巳作孝經詩三章賜
羣臣和

胡氏旦演聖通論

分見各經

宋志六十卷

內目錄一卷

佚

崇文總目皇朝祕書監致仕胡旦撰以易詩書論語
先儒傳注得失參糅故作論辨正之易百篇書五十
六篇詩七十八篇論語十八篇凡二百五十二天聖
中獻之

晁公武曰其所論易十六卷書七卷詩十卷禮記十
六卷而春秋論別行天聖中嘗獻於朝博辨精詳學
者宗焉

陳振孫曰易十七書七詩十禮記十六春秋十其第

一卷為目錄旦太平興國三年進士第一人恃才輕躁累坐擯斥晚尤黷貨持吏短長為時論所薄然其學亦博矣

蔣氏至經解

佚

陳耆卿曰臨海人字造之大中祥符六年詔舉遺逸章守德象以名聞詔索所著經解以進授將仕郎本州助教

黃氏 敏求 九經餘義

宋志一百卷

佚

會要祥符五年正月以懷安軍鹿鳴山人黃敏求為
本軍助教敏求明經術嘗著九經餘義四百九十篇
轉運使滕涉以其書上進帝命學士晁迥等看詳迥
等言所著撰可采故特有是命

崇文總目皇朝處士黃敏求撰摭諸家之說是非者

裁正之

中興書目注疏之外言其餘義凡四百九十有四篇

孔氏維等校勘五經正義

百八十卷

佚

王海端拱元年三月

孫氏爽經典徽言

五十卷

佚

玉海天聖初孫奭撰五經切治道者為五十篇號經
典徽言上之

賈氏

昌朝

羣經音辨

宋志三卷

今本七卷

存

昌朝自序曰臣聞古之人三年而通一藝三十而五
經立蓋資性敏悟材智特出者焉臣自蒙恩先朝承

乏庠序逮今入侍內閣凡二十年年踰不惑裁能涉獵五經之文於五經之道固未有所立嘗患後世字書磨滅惟唐陸德明經典釋文備載諸家音訓先儒之學傳授異同大抵古字不繁率多假借故一字之文音詁殊別者衆當為辨晰每講一經隨而錄之因取天禧以來巾橐所志編成七卷凡五門號羣經音辨一曰辨字同音異凡經典有一字數用者咸類以篆文釋以經據先儒稱當作當為者皆謂字誤則所

不取其讀曰讀為讀如之類則是借音固當具載二
曰辨字音清濁夫經典音深作深音廣作廣世或謂
其儒者迂疎強為差別臣今所論則固不然夫輕清
為陽陽主生物形用未著字音常輕重濁為陰陰主
成物形用既著字音乃重信稟自然非所強別以昔
賢未嘗著論故後學罔或思之如衣施諸身曰衣冠
加諸首曰冠此因形而著用也物所藏曰藏人所處
曰處此因用而著形也並參考經故為之訓說三曰

辨彼此異音謂一字之中彼此相形殊聲見義如求
於人曰假與人曰假毀佗曰敗自毀曰敗觸類而求
其意趣四曰辨字音疑渾如上上下下之類隨聲分
義所傳已久今用集錄五曰辨字訓得失如冰凝同
字汜汜異音學者昧之遂相淆亂既本字法爰及經
義從而敷暢著於篇末此書斷自易書詩禮三經春
秋三傳暨孝經論語爾雅凡字有出諸經箋傳中者
先儒之說沿經著義既釋文具載今悉取焉凡字之

首音雖顯而經傳不載者則依釋文為解凡字之音

義章灼者則不復引據音辨之作欲使學者知訓故之言咸有所自聊資稽古之論少助同文之化謹上

王觀國後序曰沈隱侯高才博洽名亞董遷始譜四聲用分清濁以彰天子聖哲及製郊居賦示草王筠

筠讀至雌霓

五的反

連蜷沈撫掌欣抃曰僕嘗恐人呼

為霓次至墜石碓星冰垂堦而帶坻筠皆擊節曰知音者希真奇殆絕所以相要正在此數句耳嗚呼郊

居賦一篇無甚高論尚病世俗不能辨其音況羣經乎約欲正音徒留意於詞章含宮咀商惡覩五經之微奧是宜梁武不甚遵用涕唾視之又何足怪夫國朝之興首以六經涵養士類建仁廟當宁儒風載郁典章燦然文元賈魏公總角遽曉羣經章解句達累官國子監譽望甚休遷崇政殿說書天章閣侍講慶厯嘉祐中大拜居政地海內又寧其在經筵嘗進所著書曰羣經音辨凡五門七卷為後學著龜有詔頒

行實康定二年十有一月也公以經術致將相出入
文武有謀有庸被知裕陵始終如一勲上柱國邑萬
五千戶其遭遇之厚極儒者榮下視沈約見薄於蕭
梁真局促轅下駒耳故能推其所學西破趙元昊南
走儂智高外絕契丹之謀內弭甘陵之變羣經之效
照若日星自胡蝗翳天神汴失守六飛巡幸駐蹕三
吳戎事方興斯文未喪上留神經術登用鴻儒親札
中庸班賜多士發明奧境表章六經州建學官教覃

溥率紹興己未夏五月臨安府學推明上意鏤公音
辨數錫方州下逮諸邑寧化號稱多士部屬臨汀新
葺縣庠衿佩雲集是書初下繕寫相先字差毫釐動
致魚魯且患不能周給諸生固請刻本藏於黌宮以
廣其傳嘯工東陽閱月方就解頤折角馳騁羣經者
自是遂得指南矣蓋五經之行於世猶五星之麗於
天五岳之蟠於地五行之蕃於物五事之秀乎人康
濟羣倫昭蘇萬彙其功豈淺淺哉自有經籍以來未

嘗無音沈熊著周易音三卷王儉著尚書音四卷魯
世達著毛詩音二卷李軌著禮記音二卷徐文遠著
春秋左傳音三卷非無音也無音辨爾是宜句讀不
明師承謬戾禮經以冑為冪左氏以為為遂或於老
氏更載為哉或於洪範改頗為陂以至讀景為影命
昭為韶文異而音同行翻有四召切有三丈同而音
異傍及史傳諸子百家音雜字叢蓋亦不勝其訛矣
甚者武夫悍卒昧於一丁老師宿儒惑於三豕取作

屋穿鎚之誚貽杖杜伏獵之譏②④殊形乃劣異狀
忌水乃改洛為雒惡走乃省隨為隋類用俗文俱緣
臆出以下上為下上以縱橫為縱橫謚煬帝以為驕
好奇乃爾易穆公而為繆振古如茲音辨之行固非
小補漢唐藝文志箋注之書有曰音隱有曰音畧有
曰音義有曰音訓有曰音鈔有曰釋音是其於音未
必能辨有曰辨證有曰辨疑有曰辨嫌有曰辨惑有
曰辨字有曰注辨是其所辨未必皆音獨陽休之著

書號辨嫌音又皆蕪累不經為魏收所薄惟賈魏公
沈研經旨析類辨音傳注箋題不為曲釋櫛理疑義
啓沃宸衷至先王治心守身經理天下之微意指物
警事毫析縷解故其辨明舛誤是正羣書上不欺乎
君下不欺乎民愈久愈明千載不泯渡江之後戎冠
博帶傳習益多汀與虔鄰也民喜弄兵盜賊蠭起郡
城坐甲仰食如蠶方鄰壤用師日疲饋運治賦餘暇
獨與諸生雍容俎豆間談經究微從事音辨幾於不

達時務也鏤板於學雖秀民肄業瀝懇有陳亦長此
邦者之所願欲也書舊有序姑跋其後云

陳振孫曰丞相真定賈昌朝子明撰康定中侍講天
章閣所上凡五門

章氏

宗業

五經釋題雜問

宋志一卷

佚

楊氏

安國

等五經精義

二百二十卷

佚

玉海皇祐三年十月丙申詔楊安國等以五經正義
節解為書令先撰序及名丁酉安國等請名曰五經
義宗精義樞要詔以五經精義序進讀畢賜茶而退辛
延和殿安國等上五經精義序進讀畢賜茶而退辛
丑降付邇英閣四年六月壬寅延和殿侍講學士上
五經精義周易節解二十卷十一月甲寅御邇英閣

侍讀上尚書節解三十卷五年四月癸卯上禮記節解九十卷十月甲寅上春秋節解八十卷仁宗又命侍讀丁度等修纂五經精義周易節解度等言詩書凶服及春秋賊亂皆舊所不講今去留係上旨上曰先王吉凶之制百代所遵不可以俗忌而簡去春秋喪亂之事皆有善惡鑒戒人主所宜知也亦當存之

齊氏

唐

五經要旨

通志五十卷

佚

姓譜唐字祖之山陰人天聖進士南雄州僉判歷職
方員外郎

劉氏敞七經小傳

宋志五卷

存

中興書目雜釋詩書春秋周禮儀禮禮記論語七經
晁公武曰皇朝劉敞原甫撰其所謂七經者毛詩尚

書公羊周禮儀禮禮記論語也元祐史官謂慶厯前學者尚文詞多守章句注疏之學至敞始異諸儒之說後王安石修經義蓋本於敞公武觀原甫說伊尹相湯伐桀升自陬之類經義多勦取之史官之言不誣

陳振孫曰前世經學大抵祖述注疏其以已意言經著書行世自敞倡之惟春秋既有成書而詩書三禮論語見之小傳又公羊左氏國語三則附焉故曰七

經

吳曾曰慶歷以前學者尚文辭多守章句注疏之學
至劉原甫為七經小傳始異諸儒之說王荊公修經
義蓋本於原甫云

胡氏

順之

經典質疑

六卷

佚

姓譜順之原州臨涇人舉進士為青州從事遷尚書

屯田員外郎

盧氏士宗五經精義

佚

玉海仁宗實錄盧士宗在經筵撰五經精義上之詔

藏史館

楊氏繪羣經索蘊

宋志三十三卷

佚

李氏

清臣

六經論

一卷

存

載皇宋文選

劉氏

昇

七經中義

宋志一百七十卷

佚

王應麟曰有易無儀禮

王氏

庠

經說

一篇

闕

宋史王庠字周彥榮州人嘗以經說寄蘇軾謂二帝
三王之臣皆志於道惟其自得之難故守之至堅自
孔孟作六經斯道有一定之論士之所養反不逮古
乃知後世見六經之易忽之不行也軾復曰經說一
篇誠哉是言大觀庚寅行舍法於天下州以庠應詔
時嚴元祐黨禁庠自陳蘇軾蘇轍范純仁為知己呂

陶王吉嘗薦舉黃庭堅張舜民王鞏任伯雨為交游
不可入舉求仕復舉八行第一朝廷知不可屈賜號
處士尋改潼川府教授賜出身及章服一日四命俱至
竟力辭不受

程子頤河南經說

宋志七卷

存

陳振孫曰繫辭說一書一詩二春秋一論語一改定

大學一程氏之學易傳為全書餘經具此

張子載經學理窟

宋志三卷

存

晁公武曰雜記經傳之義辨釋老之失

汪偉序曰橫渠經學理窟或以為先生所自撰偉按
熙寧九年秋先生集所立言以為正蒙其平日所俯
而讀仰而思妙契而疾書者宜無遺矣明年遂捐館

舍所謂文集語錄諸經說等皆出於門人之所纂集
若理窟者亦分類語錄之類耳言有詳略記者非一
手也雖然言之精者固不出於正蒙謂是非先生之
蘊不可也論學則必期於聖人語治則必期於三代
至於進為之方設施之術具有節級鑿鑿可行非徒
託之空言者朱子曰天資高則學明道不然且學二
程橫渠良以橫渠用功親切有可循守百世而下誦
其言若盲者忽覩日月之光聾者忽聆雷霆之聲偷

情之夫咸有立志其正蒙之階梯與其間數條與遺書所載不殊可見先生平昔與程氏兄弟議論之同而非勦以入也大理丞莆田黃君伯固志趣高遠守道篤信有先生之勇間取理窟刻於官寺俾有志之士知所嚮往亦推先生多栽培思以及天下之意云黃輦跋曰先生經說之類朱文公編次近思錄取之矣獨理窟世所罕見然晁氏讀書志有經學理窟一卷張某撰黃氏日抄亦謂橫渠好古之切故以詩書

次周禮焉但晁云一卷而此則五卷豈本自一卷而為後人所分未可知也考之近思錄凡取之先生文集語錄諸經說者乃皆出於理窟意理窟亦其門人彙輯文集語錄諸經說之語而命以是名殆非先生所自著也然則晁氏與日抄之所云者其又未必然先生文集及諸經說皆不傳其見於近思錄者亦無幾猶幸是編之存先生所謂知禮成性變化氣質之道學必如聖人而後已者蓋屢書焉世之欲求先生

之學者其可忽諸

王氏安石三經新義

佚分見各經

薛應旂曰王介甫解洛誥有不可曉者則闕之此亦見其不專於自用也劉子澄嘗言王介甫不憑注疏欲修聖人之經不拘格例欲新天下之法可謂知務但其出於已者反不逮舊以至誤國害民又曰介甫三經義皆頒之學官既而誅絕之甚遂泯其傳自

今思之或不無一二可取當時不以人廢言可也

宋鑑紹興九年沙縣陳淵為右正言入對因論程頤
王安石學術同異上曰楊時之學能宗孔孟其三經
義辨理甚當淵曰楊時始宗安石後得程顥師之乃
悟其非上曰視三經義解具見安石穿鑿矣淵曰穿
鑿尚小至於道之大原安石無一不差上曰云何淵
曰聖學所傳止有論孟中庸論語主仁中庸主誠孟
子主性安石皆暗其原仁道至大論語隨問隨答以

愛人語樊遲特其一端而已而安石遂謂以愛為仁其言中庸則謂中庸所以接人高明所以處己孟子七篇專發明性善而安石取揚雄善惡混之說至於無善無惡又溺於佛其失性遠矣

楊氏時三經義辨

宋志十卷

未見

中興書目辨王安石書詩周禮三經義之失

玉海紹興五年六月起居郎朱震言故龍圖閣學士
楊時所著三經義辨請令本家抄錄投進

呂本中曰龜山沈浸經書推廣師說窮探力索務極
其趣涵蓄廣大而不敢輕自肆也

朱子曰龜山一出追奪荆公王爵罷配享孔子且欲
劈毀三經板士子不樂遂相與聚問三經有何不可
輒欲毀之當時龜山亦謹避而已

王氏 居正 三經辨學

三十八卷

分見諸經

佚

呂祖謙狀曰公之學根極六藝深醇閎肆以崇是闢
非為已任自其少年已不為王氏說所傾動慨然欲
黜其不臧以覺世迷其在兵部以事請對因及王安
石新學為士大夫心術之害請以辨學為獻上許之
公既上辨學而龜山楊先生三經義辨亦上於祕府
於是孔孟之本旨始明天下遂不復宗王氏

宋鑑紹興五年正月兵部侍郎王居正獻辨學四十
二篇居正嘗入見請以舊所論著王安石父子平昔
之言不合於道者為獻上許之居正乃釐為七卷其
一曰蔑視君親虧損忠義凡所褒貶悉害名教其二
曰非聖人滅天道詆誣孔孟宗尚佛老其三曰深懲
言者恐上有聞其四曰託儒為姦以行私意變亂經
旨厚誣天下其五曰隨意互說反覆皆危其六曰排
斥先儒經術自任務為新奇不恤義理其七曰三經

字說自相牴牾詔送祕書省又進言曰臣聞陛下深惡安石之學久矣不識聖心灼見弊安在敢請上曰安石之學雖以霸道取商鞅富國強兵今日之禍人徒知蔡京王黼之罪而不知天下之亂生於安石居正對曰禍亂之原誠如聖訓然安石所學得罪於萬世者不止此因為上陳安石訓釋經義無父無君一二事上作色曰是豈不害名教孟子所謂邪說者正謂是矣居正退即序上論繫於辨學書首上之

胡氏埜諸經講義

佚

江西通志胡埜字德林寧都人政和八年進士婺州教授方臘陷城罹害

黃氏彥遠五經指南

佚

江西通志黃彥遠字思邈金谿人政和二年進士為平江府教授調吉水令

張氏

邦彥

經解

佚

樓鑰曰邦彥政和二年由太學上舍擢進士第官左
朝散郎贈朝議大夫有經解雜著數十卷

鄭氏

首

六經解

佚

閩書首字晉信福清人宣和二年鄉薦南渡後被許
賜死

張氏綱六經辨疑

宋志五卷

佚

六經確論

宋志十卷

佚

王氏廷珪六經講義

十卷

佚

陳氏

光

六經講解

佚

閩書字世德永春人與陳知柔為友梁克家受業焉
官封州僉判權知贛州嘗進六經講解

蕭氏

楚

經辯

二卷

未見

陳第曰凡四十九篇




經義考卷二百四十二

總校官庶吉士臣侍朝

校對官中書臣孫希旦

謄錄監生臣蔣維璽



欽定四庫全書薈要

史部

經義考卷二百四十

三至五

詳校官員外郎臣潘紹觀



欽定四庫全書舊要卷九千九百七十二

史部

經義考卷二百四十三

翰林院檢討朱彝尊撰

羣經

五

漢儒授經圖

佚

俱自序曰古者尊師而重道自天子達於庶人故孔
安國授經昭后死為之服桓榮傳明帝於東宮及即

(漢書)

經義考

漢儒授經圖

尊位幸其第至里門下車擁經而前蓋其嚴如此漢興諸儒以經誼專門教授故學者必有師承源流派別皆可推考歷東漢二晉以迄有唐餘風猶有存者然其間大儒間出不專以一經章句授諸生如王通行道於河汾之間韓愈抗顏於元和之際故從之學者其於行已成務作為文章皆足以名世而垂後如魏徵王珪李翱皇甫湜之徒是也陋哉夏侯勝之言也曰士病經術不明經術苟明取青紫如俯拾地芥

耳夫所貴於學者豈專為是哉而勝以利誘諸生何也西漢之俗固已尚通達而急進取矣又使士專為利而學學而仕仕而顯則不過容悅患失而已如張禹以經為帝師位丞相而被佞臣之目後世議者謂西漢之亡以張禹谷永因災異之對枉公議以阿王氏二人者皆成帝所取決關漢存亡之機者也然則懷姦徇利豈其志本在青紫故耶後世君子志於青紫者衆求師務學者寡學者亦無所師承此余所以

常恨生之晚也方祖宗隆盛之時如孫明復胡翼之以經術楊文公歐陽文忠以學問文章為一時宗師學者有所折衷而問業焉王荊公出以經義授東南學者及得君行政於天下靡然宗之元祐間蘇子瞻以文章主英俊之盟亦云盛矣余卧病里中讀西漢儒林傳觀其師弟子授受之嚴所謂源流派別皆可推考者竊有感焉且浮屠氏自釋迦文佛傳心法與夫講解之宗至於今將二千年而源派譜牒如數一

二下至醫巫祝卜百工之技莫不有所師如吾儒師承之道乃今蔑焉所謂學官師弟子如適相遇於塗耳盖可歎也則其事業之不競語言之不工名節之不立無足怪者因以漢儒授經為圖以想見漢興之風範云建炎四年六月

羅氏無競經解

佚

胡銓作傳曰羅無競字謙中廬陵人仕為建寧主簿

卒門下客私謚曰孝逸先生有經解數卷

吳氏沆羣經正論

四卷

佚

玉海紹興十六年九月吳沆進羣經正論四卷

鄭氏伯熊六經口義拾遺

佚

宋氏藻羣經滯穗

百篇

佚

閩書藻字去華莆田人紹興中進士知江陰軍

黃氏開六經指南

佚

任氏文薦六經章句

佚

姓譜閩縣人紹興中進士歷浙江提刑本路都轉運

使

楊氏

汝南

經說

三卷

未見

一齋書目有

陸元輔曰汝南字彥侯龍溪人紹興中進士為廣州教授撫詩禮中庸春秋義成三十篇以授學者仍表

進於朝

洪氏

適

經子法語

未見

楊氏^甲六經圖

六卷

存

中興書目紹興中布衣楊甲撰

毛氏^{邦翰}增補六經圖

六卷

存

中興書目紹興中布衣楊甲撰六經圖乾道中毛邦翰復增補之易七十書五十有五詩四十有七周禮六十有五禮記四十有三春秋二十有九合為圖三百有九

苗昌言序曰陳大夫為撫之期年樂民之安於其政思所以富之教之之叙既已創闢試院以奉聖天子三年取士之制又取六經圖命泮宮執講肄者編類為書刊之於學以教諸生謂昌言掌教於是邦積十

餘年而庠序友生相與愛敬之不哀俾叅訂焉既逾
月諸經諭各以其圖就議於予且曰六藝之文浩博
若欲別加編摩非積以歲月有不能是圖集諸家所
長願因其舊庶得以亟稱賢大夫善教之意予韙其
說無敢去取惟傳寫詮次有舛誤者是正之而已凡
得易七十書五十有五詩四十有七周禮六十有五
禮記四十有三春秋二十有九合為圖三百有九蓋
嘗論之自漢儒章句傳注之學行而士之道學益不

明逮本朝以經術取士大儒繼出講解一新而後天下之士皆知淵源之歸今是圖之作凡六籍之制度名數粲然可一二數使學者因是求其全書而讀之則造微詣遠茲實其指南也若因以得於觀瞻之間遂以為聖人之經盡在於是則破碎分裂不尤甚於為之華藻輦輓者耶其不見斥於覃思幽眇者寡矣然則陳大夫之易圖為書不無意也觀者宜深思之顧起元曰六經圖為宋紹興中布衣楊甲所撰乾道

初知撫州陳森屬教授毛邦翰等補而刻之為圖三百有九舊鮮行世者頃新都吳氏購得宋本始授梓人計部大夫汝南方公覽而善之謀於同僚諸大夫斥帑羨復刻而存於署既成屬為之叙夫圖書之用創於聖人使百代憲章譬諸經緯勿可偏廢者也古之學者得其書必考其圖後之學者脩雕繪之技或以詞藻相矜嚴於古之名物度數牴牾濶疏者有矣不知形而上者謂之道形而下者謂之器天下之道

貞夫一者也使盡廢其形則罷亡而道亦不可見矣
故曰書不盡言言不盡意聖人立象以盡意然則標
於指外通於意表惟圖能之是固書之所不盡也窮
經者試以是叅伍而想像之於六藝之言當更有洞
若觀火者又安得謂觀象非忘言之妙哉余又嘗考
之易有唐沈熊之譜宋劉牧朱震之圖書有唐之無
逸圖治要圖詩有魏衛協之圖唐之草木蟲魚圖春
秋有漢嚴彭祖唐張傑李瑾之圖宋鄧名世之譜禮

有漢鄭玄阮譔唐張鎰夏侯伏明宋梁正聶崇義之
圖陸佃之象今皆軼不存而是編所圖多沿舊記黨
枯護朽間亦有之夫謬解犧尊臆注葵首昔之通人
不無可議今以此掎摭異同糾迪淆舛因形契理親
見古人則是圖誠為六藝之津涉也方今古學載興
異書間出羽陵蠹簡半在人間顧經笥斷殘尚須揚
榘方公與諸大夫亟舉是編而表章之其於通經學
古裨益弘多矣

陸元輔曰六經圖宋紹興中布衣楊甲撰乾道初撫
州教授毛邦翰等補大易象數鉤深圖七十首易有
太極圖二次乾知大始次坤作成物次天尊地卑次
參天兩地圖次日月為易次河圖數圖次洛書數圖
次天地之數次乾坤之策次六子圖次六位圖次伏
義先天圖次方圓相生圖次仰觀天文圖次俯察地
理圖次伏羲八卦圖次文王八卦圖次八卦取象圖
次八卦象數圖次四卦合律圖次八卦納甲圖次剛

柔相摩圖次八卦相盪圖次六爻三極次五位相合
次帝出震圖次著卦之德次序上下經圖次三變大
成圖次重易六爻圖次六十四卦天地數圖次六十
四卦萬萬數圖次卦爻律呂圖次運會歷數圖次乾
坤大父母圖次復姤小父母圖次八卦生六十四卦
圖次八卦變六十四卦圖次陽卦順生次陰卦逆生
次復姤臨遯泰否六卦生六十四卦圖次六十四卦
反時變圖次六十四卦卦氣圖次十三卦取象圖次

三陳九卦圖次叅伍以變圖次十有八變圖次一陰
一陽圖次先甲後甲圖次陰陽君民次陰陽奇耦次
二儀得十變化次十日五行相生次大衍之數圖次
揲著之法圖次河圖百六數次八卦司化圖次類聚
羣分圖次通乎晝夜圖次陽中陰次陰中陽次序卦
圖次雜卦圖次太玄準易卦名圖次太玄準易卦氣
圖次皇極經世全數圖次邵氏皇極經世圖次溫公
著虛擬玄圖次古今易學傳授圖尚書軌範撮要圖

五十有五首五十八篇數圖次逸書篇圖次作書時
世圖次帝王世次圖次夏世次圖次秦世次圖次晉

魯世次圖次堯典四仲中星圖次日月會次舍圖次
四仲日永短圖次四時測中星圖次日月行冬夏圖
次堯九族圖次舜巡四岳圖次七政五辰圖次璣衡
圖次諸侯玉帛圖次律度量衡圖次十二章服圖次
五聲八音圖次六律六呂圖次九韶樂器圖次五刑
四罪圖次舜舞干羽圖次禹貢隨山濬川圖次禹貢

九州疆界圖次禹貢治水先後圖次禹貢九州譜圖
次禹貢九山名數圖次禹貢九川名數圖次濬畝澮
距川圖次堯制五服圖次弼成五服圖次舜十二州
圖次商七廟圖次商五遷都圖次周營洛邑圖次召
誥土中圖次九疇本河圖圖次九疇虛五用十圖次
洪範九疇圖次九疇合八疇數圖次九疇相乘得數
圖次劉蘇洪範傳圖二次皇極居次五圖次皇極不
言數圖次周宗彛圖次六年五服朝圖次君牙太常

圖次平王錫圭瓚圖次牧誓兵器圖次費誓兵器圖
次漢儒授受書學圖毛詩正變指南圖四十有七篇
首詩篇名次作詩世次次周公世次次召公世次次
衛世次次齊世次次曹世次次陳世次次晉世次次
秦世次次宋世次次族譜次十五國風譜次十五國
地理圖次日居月諸圖次公劉相陰陽圖次楚丘揆
日景圖次齊國風摯壺氏圖次大田雨我公田圖次
甫田歲取十千圖次百夫之田次萬夫之田次載芟

藉田圖次時邁巡守圖次我將明堂圖次清廟閟宮
圖次辟雍泮宮圖次斯干考室圖次秦國風小戎圖
次商頌王猷圖次釋草名次釋木名次釋菜名次釋
穀名次釋鳥名次釋獸名次釋蟲名次釋魚名次釋
馬名次釋衣服制名次釋車馬器名次釋禮樂器名
次兵農器名次四詩傳授圖周禮文物大全圖六十
有五首天官冢宰次地官司徒次春官宗伯次秋官
司寇次冬官考工記次王宮制圖次營國制圖次經

九軌圖次朝位寢廟社稷圖次宗廟圖次社稷圖次
治朝圖次燕朝圖次外朝圖次夏世室次商重屋次
周明堂次宮寢制圖次庖制圖次几筵制圖次王畿
千里圖次王畿鄉遂采地圖次井田之法圖次四井
為邑圖次四邑為邱圖次四邱為甸圖次四甸為縣
圖次四縣為都圖次四都為同圖次六鄉圖次六遂
圖次五等采地圖次六鄉鄉地圖次職方九服圖次
職方九州圖次行人六服朝貢圖次王公侯卿士冕

服圖次后服制圖次圭璧璋瓚繅藉制圖次圓丘樂
圖次方丘樂圖次宗廟樂圖次分舞樂圖次筍簫鐘
磬制圖次鳧氏為鐘次木鐸金鐸次鼓人四金圖次
舞師樂師舞制圖次鼓制圖次樂器制圖次祭器制
圖次六尊制圖次六彝制圖次掌客器圖次鬯人制
圖次金車玉輅制圖次墨車制度圖次厭翟車制圖
次輪人為蓋圖次九旗制圖次射侯制圖次馮相太
歲圖次龜人圖次筮人圖次土圭測日圖次水地法

圖次傳授圖禮記制度示掌圖四十有三首四十九
篇數次二十四氣圖次七十二候圖次月令中星圖
次月令明堂圖次十二律還相為宮圖次月令十二
律管候氣圖次月令所屬圖次月令仲春昏星圖次
月令仲夏昏星圖次月令仲秋昏星圖次月令仲冬
昏星圖次五社制度圖次五帝坐位圖次王制商建
國圖次王制周建國圖次王制公卿大夫士圖次天
子縣內圖次周公明堂圖次武舞表位圖次冠冕制

圖次器用制圖次七廟制圖次祫廟制圖次五廟三
廟圖次別子祖宗圖次郊禘宗祖圖次堂上昭穆圖
次室中昭穆圖次燕禮圖次投壺禮圖次鄉飲禮圖
次養老禮圖次冠禮器圖次昏禮器圖次習射禮圖
次饗禮圖次內外用事之日圖次祭祀用樽之數圖
次禮記名數圖次禮記傳授圖春秋筆削發微圖二
十有九首春秋十二公次二十一國世次圖次春秋
一百二十四國爵姓次五霸次齊盟次與盟之國次

春秋諸國地理圖次地名所屬次諸國地理次周地
次魯地次陳地次齊地次晉地次宋地次衛地次鄭
地次楚地次邾地次莒地次紀地次諸國地次閼地
次周王族諸氏次魯公族諸氏次晉公族諸氏次齊
公族諸氏次宋公族諸氏次衛公族諸氏次鄭公族
諸氏次陳公族次蔡公族次吳公族次莒公族次曹
公族次虞公族次虢公族次諸侯興廢次春秋始終
次春秋總例數次春秋三傳傳授圖共三百有九圖

葉氏仲堪六經圖

宋志七卷

未見

陳振孫曰東嘉葉仲堪思文重編按館閣書目有六
卷昌州布衣楊甲鼎卿所撰撫州教授毛邦翰增補
之易七十今百三十書五十五今六十三詩四十七
今同周禮六十五今六十一禮記四十三今六十二
春秋二十九今七十二然則仲堪蓋又以舊本增損

既定者耶

楊氏

萬里

六經論

一卷

存

載誠齋集

呂氏

祖謙

麗澤論說集錄

通考十卷

存

陳振孫曰呂祖謙門人所錄平日說經之語末三卷

則史說雜說東萊於諸經有讀詩記及書說成書而

未終也

唐氏

仲友

說齋六經解

一百五十卷

未見

一齋書目有

九經發題

一卷

佚

先民錄唐仲友字與政金華人號說齋登紹興辛未
進士復中宏詞科判建康府轉知台州抑姦拊弱發
粟賑饑創中津浮橋以濟涉政聲卓然俄為同官高
文虎所忌譖諸倉使屢疏劾之會仲友遷提點江西
刑獄而劾者益力遂主管沖祐觀以歸開席授徒學
者數百人益肆力於經史百家以究其業著帝王經
世圖譜十卷六經解諸史精義羣書新錄各若干卷
文集四十卷

周必大曰與政於書無不觀於理無不究凡天文地理禮樂刑政陰陽度數兵農王霸皆本之經典兼采傳注類聚羣分旁通午貫使事時相叅形聲相配或推消長之象或列休咎之徵而於郊廟學校畿疆井野尤致詳焉昔漢儒專通一經局守師說居家用以脩身蒞官取以決事況乎六經旨趣百世軌範廣記備言精思博考使見諸行事豈不要而有功也與蘇伯衡曰乾道淳熙間紫陽朱子廣漢張子東萊呂

子鼎立於一時而東南學者翕然宗之說齋唐公出
乎其時又與呂子同居於婺而獨尚經制之學真可
謂特起者矣而豈立異哉公不惟精史學尤邃於諸
經自謂不專主一說不務為苟同隱之於心稽諸聖
人合者取之疑者闕之所著六經解百五十卷九經
發題經史難答孝經解愚書各一卷諸史精義百卷
帝王經世圖譜十卷乾道祕府羣書新錄八十三卷
天文地理詳辨各三卷故事備要詞科雜錄各四卷

陸宣公奏議詳解十卷說齋文集四十卷今去公垂
二百年傳者蓋無幾矣揚雄有言存則人亡則書欲
求公於公之書而其書又如此不愈大可惜哉

王氏

炎

諸經考疑

佚

李氏

舜臣

羣經義

宋志七卷

本傳八卷

佚

徐氏存 六經講義

佚

喻氏良能 諸經講義

佚

浙江通志喻良能義烏人官至太常寺丞

劉氏先祖 山堂疑問

通考一卷

佚

陳振孫曰起居郎簡池劉先祖德脩撰凡一卷慶元
中謫居房陵與其子講說諸經因筆記之以其所問
於詩為多遂取呂氏讀詩記盡觀之而釋以己意附
疑問之後

俞氏

亨宗

羣經感發

十卷

佚

紹興府志俞亨宗字兼善山陰人隆興二年進士嘉

定中為秘書少監

游氏桂畏齋經學

宋志十二卷

佚

陳振孫曰宣教郎廣安游桂元發撰桂隆興癸未進士歷官至制司機宜

彭氏龜年訓蒙經解

佚

樓鑰撰碑曰嘉定改元詔贈故吏部侍郎彭龜年為
寶謨閣直學士既又加贈龍圖閣學士賜謚忠肅公
登乾道五年進士第嘗著訓蒙經解若干卷藏於家

張氏_布六經講解

佚

陳耆卿曰臨海人字伯塲乾道八年進士歷太學錄
博士樞密院編修官宗正丞權金部右侍郎遷祕書
丞知徽州不赴奉祠終朝散大夫有六經講解藏於

家

毛氏

璞

六經解

佚

葉氏

適

習學記言序目

五十卷

存

孫之宏序曰習學記言序目者龍泉葉先生所述也
初先生輯錄經史百氏條目名習學記言未有論述

自金陵歸研玩羣書更十六寒暑乃成序目五十卷
子家既以先志編次諗今越帥新安江公鉅木郡齋
又囑之宏揭其大指於書首竊聞學必待習而成因
所習而記焉稽合乎孔氏之本統者也夫去聖縣邈
百家競起學失其統久矣漢唐諸儒皆推宗孟軻氏
謂其能嗣孔子至本朝閩洛驟興始稱子思得之曾
子孟軻本之子思是為孔門之要傳近世張呂朱二
三鉅公益加探討名人秀士鮮不從風而靡先生後

出異識超曠不假梯級謂洙泗所講前世帝王之典
藉賴以存開物成務之倫紀賴以著易彖象仲尼親
筆也十翼則訛矣詩書義理所聚也中庸大學則後
矣曾子不在四科之目曰參也魯以孟軻能嗣孔子
未為過也捨孔子而宗孟軻則於本統離矣故根柢
六經折衷諸子剖析秦漢迄於五季以呂氏文鑑終
焉其致道成德之要如渴飲飢食之切於日用也指
治摘亂之幾如刺臍中盲之速於起疾也推迹世道

之升降品目人材之短長皆可繩準而銖稱之前聖之緒業可續後儒之浮論盡廢其切理會心冰消日朗無異親造孔室之閎深繼有宗廟百官之美富可謂稽合乎孔子之本統者也

黃百家曰習學記言存於今者序目而已內說經共十四卷易四卷書一卷詩一卷周禮儀禮合一卷禮記一卷春秋一卷左氏傳二卷國語一卷論語一卷孟子一卷若記言原本不知若干卷惜乎不得見矣

是書前有山陰孫之宏序葉氏門人

任氏

希夷

經解

十卷

佚

邵武府志任希夷字伯起邵武人淳熙三年進士官
至端明殿學士兼書樞密院事兼權叅知政事贈少
師謚宣獻

傅氏

正

羣經講義

佚

應廷育曰芷字升可義烏人淳熙五年進士仙居尉

戴氏^厚經解

三十卷

佚

樓鑰志墓曰東嘉戴居浚仲嘗薦於鄉五上禮部至
淳熙八年始以特奏名試補賀州之學尋授迪功郎
金華縣尉改脩職郎監漳州南岳廟著經解三十卷

藏於家君諱厚又字長文

李氏肅五經傳授圖

宋志一卷

佚

危氏稹諸經講義集解

佚

江西通志危稹字逢吉臨川人淳熙十四年乙科除
南康軍教授歷屯田司郎官出潮州又知漳州

徐氏 大受 經解

佚

陳耆卿曰天台人字季可淳熙十一年特科監行在
草料場號竹溪先生有經解藏於家

項氏 安世 家說

宋志十卷 附錄四卷

未見

陳振孫曰九經皆有論注其第八卷以後雜說文史

正學附錄孝經中庸詩篇

華氏鏜六經解

佚

按華氏書無傳楊誠齋荆溪集有贈詩云華
鏜晨趨孔子堂今日覃思彫肺腸毛穎為君
禿盡髮問君何時放渠歇題曰華鏜秀才著
六經解以長句書其後則其書業成編矣

經義考卷二百四十三

欽定四庫全書薈要卷九千九百七十三

史部

經義考卷二百四十四

翰林院檢討朱彝尊撰

羣經

六

黃氏

幹

六經講義

宋志一卷

未見

輔氏

廣

五經注釋

佚

李氏

大同

羣經講義

十五卷

佚

金華府志李大同字從仲東陽人學於呂成公朱文公登嘉定十六年進士官至工部尚書以寶謨閣直學士知平江府

陳氏

埴

木鐘集

十一卷

存

埴自序曰善問者如攻堅木善待問者如撞鐘朋友
講習不可以無問也問則不可以無復今之不善問
者徒先其所難後其所易取其節目之堅乃欲一斧
而薪之不少徐徐以待其自解則匠石從旁而竊笑
之矣至其待人之問者或小叩之而大鳴或大叩之
而小鳴不待其再至而亟盡其餘聲或餘之未盡而

恣其人之更端焉然則是鐘也其必州鳩氏之所棄者乎余非待問者顧諸友方持班氏之斧以運成風之巧乃欲以空中之物隨酢焉其不哆然肆黯然啞者幾希矣或曰空故能聲虛故能應壞木之竅穴而萬籟出焉物固有然者矣余有感於斯言也取二物因命之曰木鐘焉

按潛室陳氏木鐘集一論語二孟子三六經
總論四易五書六詩七周禮八禮記九春秋

附以近思雜問漢唐史各一卷

吳氏

梅卿

經說

佚

浙江通志吳梅卿字清叔仙居人嘉定十七年特舉
仕至忠州文學從朱子游

許氏

奕

九經直音

宋志九卷

未見

金
九經正訛

宋志一卷

佚

諸經正典

宋志十卷

佚

林氏

觀過
經說

宋志一卷

佚

章氏

如愚

羣書考索經說

三十二卷

存

應廷育曰章如愚字俊卿金華人慶元中進士官國
子博士改知貴州開禧初言事忤韓侂冑罷歸學者
稱山堂先生

按章氏書皆采諸家之說非自撰惟因援引

諸書刊本多失載於是唐氏稗編所錄直言如愚姓名矣書共六十六卷內言經籍圖書前集凡九卷別集凡十一卷續集凡十二卷

毛氏

居正

六經正誤

通考六卷

存

魏了翁序曰自秦政滅學經籍道熄迨隸書之作又舉先王文字而併棄之承訛襲舛愈傳愈失蔡伯喈

書石經有意正抹之旋亦焚蕩張叅所見石經又不
知果為蔡本否其所引石經文多失字體魏晉以來
則又厭樸拙者姿媚隨意遷改義訓混淆漫不可考
重以避就名諱如操之為摻昭之為侶此類不可勝
舉况唐人統承西魏尤為謬亂陸德明孔穎達同與
登瀛之選而釋文與正義自多背馳至開元所書五
經則又以俗字易舊文如以頗為陂以平為便之類
又不可勝舉而古書益邈五季而後鏤板繙印經籍

之傳雖廣而點畫義訓訛謬自若本朝胄監經史多

仍周舊今故家往往有之而與俗本無大相遠南渡

草創則僅取版籍於江南諸州與京師承平監本大

有逕庭與潭撫閩蜀諸本互為異同而監本之誤為

甚柯山毛居正義甫以其先人嘗增注禮部韻奏御

於阜陵遂又校讐增益以申明於寧考更化之日其

於經傳亦既博覽精擇嘉定十六年春會朝廷命胄

監刊正經籍司成謂無以易義甫馳書幣致之盡取

六經三傳諸本叅以子史字書選粹文集研究異同
凡字義音切毫釐必校儒官稱歎莫有異辭旬歲間
刊修者凡四經乃猶以工人憚煩詭竄墨本以給有
司而板之誤字實未嘗改者什二三也繼欲修禮記
春秋三傳義甫以病目移告其事中輟或者謂縱令
盡正其誤而諸本不同何所取證豈若錄其正誤之
籍而刊傳之後學得以參考余觀其書念今之有功
於經者豈無經典釋文六經文字九經字樣之等然

此書後出殆將過之無不及者其於後生晚學祛蔽
寤疑為益不淺因慙慙其成而序識之書曰若升高
必自下若陟遐必自邇學者其毋忽於斯

陳振孫曰柯山毛居正義甫校監本經籍之誤所欲
刊正者魏鶴山為之序而刻傳之大抵多偏旁之疑
似者凡六卷

王氏士奇諸經釋疑

佚

姓譜字永叔福安人莆田法曹奉議郎

李氏

伯玉

斛峰經義

佚

江西通志李伯玉字純甫餘干人嘉定進士累官禮

部尚書

岳氏

珂

九經沿革

闕

卷

存

珂自述曰世所傳九經自監蜀京杭而下有建余氏
興國于氏二本皆分句讀稱為善本廖氏又以余氏
不免訛舛于氏未為的當合諸本叅訂為最精板行
之初天下寶之流布未久元板散落不復存嘗博求
諸藏書之家凡聚數帙僅成全書懼其久而無傳也
爰倣成例乃命良工刻梓家塾如字畫如注文如音
釋如句讀悉循其舊且與明經老儒分卷校勘而又
證以許慎說文毛晃韻畧非敢有所增損於前偏旁

必辨圈點必校不使有毫釐訛錯視廖氏世綵堂本
加詳焉舊有總例存以為證

張萱曰宋相臺岳珂家塾刊本與九經總例相同

真氏德秀西山讀書記

通考三十九卷

存

陳振孫曰真德秀景元撰其書有甲乙丙丁甲言性
理中述治道末言出處大抵本經史格言而述以已

意今但有甲三十七卷丁二卷乙丙未見

魏氏了翁九經要義

二百六十三卷

分見諸經外有類目六卷

闕

虞集序曰聖賢之學實由秦漢以來諸儒誦而傳之得至於今其師弟子所授受以顯門相尚雖卒莫得其要然而古人之遺訓前哲之緒言或者存乎其間蓋有不可廢者自濂洛之說行朱氏祖述而發明之

於是學者知趨乎道德性命之本廓如也而從事於斯者誦習其成言惟日不足所謂博聞多識之事若將畧焉則亦有所未盡者矣況近世之弊好為鹵莽其求於此者或未切於身心而考諸彼者曾弗及於詳博於是傳注之所存者其舛譌牴牾之相承既無以明辨其是非而名物度數之幸在者又不察其本原誠使有為於世何以徵聖人制作之意而為因革損益之器哉魏氏又有憂於此也故其致知之日加

意於儀禮周官大小戴之記及取諸經注疏正義之
文據事別類而錄之謂之九經要義其志將以見道
器之不離而有以証臆說聚訟之惑世此正張氏以
禮為教而程氏所謂徹上徹下之語者也而後人莫
窺其說以兼致其力焉昔之所謂鹵莽日以彌甚甘
心自棄於孤陋寡聞之歸嗚呼魏氏之學其可不講
乎魏氏名了翁字華父臨邛人故宋慶元己未進士
仕至資政殿大學士叅知政事僉書樞密院事都督

江淮軍馬贈太師封秦國公謚文靖而學者稱為鶴山先王

王禕曰孔穎達作九經正義往往援引緯書之說歐陽公嘗欲刪而去之以絕偽妄使學者不為其所惑然後經義純一其言不果行迨鶴山魏氏作九經要義始加黜削而其言絕焉

張萱曰九經要義魏了翁著考究九經中義理制度也今內閣見存儀禮七冊禮記三冊周易二冊尚書

一冊春秋二冊論語二冊孟子二冊又於前書各段
分類為類目六卷以便簡閱尚存

錢氏

時

融堂四書管見

十三卷

存

張萱曰宋理宗朝錢時注解論語學庸附以古孝經
為四書

按錢氏四書管見有孝經而無孟子與朱子

所定四書不同故附以羣經

高氏

定子

經說

五卷

佚

盧熊曰高定子字瞻叔

闕

二年進士簽書樞密院

事兼叅知政事學者稱著齋先生

李氏

彥華

經傳辨疑

三十六卷

佚

魏了翁志曰彥華字仲實撫州宜黃人通判武岡軍
李劉之王父家故藏書至萬餘軸矻矻晨夜天文地
理禮樂律厯兵謀方伎毫分縷析體習既精晚而述
經傳辨疑禮樂遺錄三十六卷鄉人號曰藏脩先生

吳氏之巽諸經講義

五卷

佚

史氏堯輔

諸經講義

五十卷

佚

魏了翁誌墓曰堯輔字克甫居眉之丹稜受春秋於
橫舟劉子有年十五講學於德溪開禧三年以易冠
同經生尋中乙科調永康軍青城縣主簿補大足縣
尉調合州推官

吳氏獵經解

佚

魏了翁狀曰公諱獵字德夫醴陵人敷文閣直學士

贈通議大夫

謝氏

升賢

四書解

佚

張氏

貴謨

泮林講義

宋志三卷

佚

俞氏言 六經圖說

宋志十二卷

佚

周氏士貴 經括

宋志一卷

佚

梁氏南一 六經辨疑

佚

姓譜字力行

賈氏鑄考信錄

通考三十卷

未見

劉氏序畧曰友人賈君成已少余十三歲未脫舉子累且教授生徒所至坐席常滿而能歷年篤以成書世之學者於六經之疏能一閱焉者蓋寡况能叅稽其類大之如天地氣形之初微之如服食器用之末

先儒該洽兼綜凡古書之雜出者徵之而靡不在分
之而靡不貫也其書曰考信錄考諸古而信諸心又
以質於余而證於後世用意遠矣

黃氏 大昌 晦庵經說

三十卷

未見

楊氏 伯蟲 九經補韻

一卷

存

伯岳自序曰字學湮廢已久學者無以寤疑辨惑僕性嗜古癖書傳因涉獵諸經訓釋或同字殊音或假音如字若此者衆韻書率多不載竊有感焉如禮部韻一書政為聲律舉子設紹興間三山黃進士嘗補選進上乃亦闕畧弗備近嘉禾吳教杜復申明僅增三字僕之惑滋甚蓋若禮記斂般請以機封毛詩倚讎其枝之類庸可諉曰是喪制所出非程文所當用

或音義弗順非韻語所可押至如周禮合采合舞之
為釋菜毛詩鱣鮪發發之為鱣鱣皆足正後學之傳
訛助文場之窘步一切置之可乎乃即經蒐羅萃為
一編非敢上於官以求增補亦非敢淑諸人以侈聞
見姑藏家塾以擊蒙昧博識幸毋我誚

俞任禮後序曰禮部韻以畧言外多隘之而議欲增
也自元祐國子博士孫諤隨乞添收繼其後則黃啟
宗有補韻吳棫有補韻補音毛晃有增韻張貴謨有

韻畧補遺近世黃子厚蔣全甫則又各有論說然疎者隨韻補輯僅得一二詳者至盡采子史蒼雅方言欲增入二千六百五十五而難於行此禮部韻之以至今未備也泳齋先生治衢之暇日揖任禮於柯山堂而語曰子見我所纂九經補韻乎先生於書無所不讀而以經為根源補韻之作凡九經中字之假借音之旁通考訂分彙各疏其下若星象之錯落於天而燦然以明平齋洪端明所謂杜門論著佳哉者

此也平齋欲著論而後弗果他日上之朝而頒行於
禮部俟後世知國家之淑士以經則豈但為聲韻之
助任禮敢寫平齋之志而繫於後

黃氏

補

九經解

佚

梅氏

寬夫

裕堂先生諸經講義

一卷

未見

黃虞稷曰括蒼人解易詩論孟學庸諸義

黃氏 彬 經語協韻

宋志二十卷

佚

錢氏 承志 九經簡要

宋志十卷

佚

張氏 伯文 九經疑難

十卷

未見

伯文自序曰疑生於不信難起於不服經之有疑難其殆出於專門之學臆見異說自相矛盾者乎然所疑有是非而難有當否有如李泰伯疑周禮者一歐陽公疑周禮者二蘇子由疑周禮者三猶曰今之周禮非周公之全書也至若劉子元於書有疑古十條於春秋有十二未喻果何見也何休好公羊學著公

羊墨守左氏膏肓穀梁廢疾鄭玄乃發墨守鍼膏肓
起廢疾猶曰黨同伐異者爾若夫顧悅之嘗難王弼
易義四十條而關康之又申王以難顧非其品藻不
由於公論而評議獨出於私見者乎雖然是皆有可
取者昔孔門之學大概務通倫類而已顏子聞一知
十子貢告往知來故師友琢磨而德業日進使其舉
一隅而不反以三隅決不能有所疑有所難也予自
幼年趨庭先君鰾堂授以麟經涉獵之餘亦嘗取五

經三禮與夫語孟講究其大概凡平日得於先儒之
議論者寸長片善靡有不錄今取其切於場屋之用
者纂為一書題曰九經疑難非惟述其辨駁而已凡
其說之新奇意之高遠開卷一覽九經大旨瞭然胸
中矣昔房景先才學通融嘗作五經疑問百餘篇而
邢邵亦以五經指要為世指南今不見其書聊以是
擬前篇云

戴氏栩五經說

佚

王瓚曰栩字立子永嘉人師事葉適登嘉定戊辰進士為太學博士遷秘書郎出知臨江軍不赴久之起湖南安撫司叅議官

王氏^奕六經說

佚

經義考卷二百四十四

欽定四庫全書薈要卷九千九百七十四

史部

經義考卷二百四十五

翰林院檢討朱彝尊撰

羣經

七

饒氏

魯

五經講義

未見

劉氏

元剛

三經演義

宋志十一卷

佚

葉氏時對制談經

十五卷

存

杜涇序曰是編乃文康葉公所著貫穿經史言言典則真經濟之第一義也舊文百篇散出無緒深閎探討今立十五門分統之便簡閱也或有片言匪要則稍加汰節其典章名物難以懸解者悉取經文注疏

分隸於後字義音韻未易通曉者徧考韻會羣書標
識於端句讀辨之亥豕正之使讀者開卷洞然具見
先生之武庫矣非敢言先生之忠臣庶幾哉非先生
之叛臣乎以其可資制作之用爰命之曰對制談經
云

黃氏 仲元 經史辨疑

未見

姓譜仲元字善甫莆田人咸淳中登第陸秀夫薦充

益王府撰述官遷太常博士宋亡更名曰淵字天叟

黃氏震日抄經說

三十一卷 分見各經

存

沈達序曰學以孔孟為師師者道之所存其文則六經之書也講習以窮理躬行以達用斷乎不可易者宋儒標榜角立互有異同而象山陸氏始倡為高遠驚世之論謂此心本明不假言議惟當自求以得之

凡講學即是異端六經皆吾注腳一時聞人風靡從之獨慈谿黃東發氏尊信周程朱子之說以上探孔孟六經之旨一切反之躬行以為實用於士必以操行自立於官必以職業自見至讀論語而於孝弟忠信文公所以教人者蓋佩服終身焉故自強仕用明經家法取科第積州縣吏能歷監司郡守所至有異政仁民厚俗一本之禮義立朝諤諤敷對無隱情雖遭讒去國未究其設施而言論氣節千載有光斯可

謂不負所學者矣公暇所閱經史諸書隨手考訂并
奏劄申請勸誡等作凡百卷名之曰日鈔鋟梓行於
世中值兵燬諸孫禮之懼祖訓之失墜購求搜輯補
刻僅完屬予序之予惟科目利誘之弊至趙宋而極
其以道學云者又皆從事空言而於躬行大業或未
之能然彼其立異矯時固為賢智之過望而可知其
非百餘年間未有以折衷猶賴先生詳辨力詆著之
方冊俾孔孟周程朱子正大之學燦然復明如杲日

行空沈陰積霽廓焉為之一清有目者皆可睹也方
陸學盛行慈湖楊簡氏宗陸者也於公為鄉人公未
嘗苟從末俗波蕩中卓見定力一人而已世之師若
弟子玩味是書必若公乏於文公身體而力行之而
後可以言學顧余淺陋何足以知先生曾秩滿將歸
禮之請之益勤敬書於卷端以為願學者勉若其文
詞論述浩瀚峻潔特公之餘事茲故可畧云時至正
三年歲在丁丑四月

王圻曰五經朱子於春秋禮記無成書慈谿黃東發
取二經為之集解其義甚精盖有補朱子之未備且
不欲顯故附於日鈔中其後程端學有春秋本義陳
澔有禮記集說皆不能過之永樂初修五經大全諸
儒皆未見日鈔故一無所取

曹氏涇五經講義

四卷

未見

黃虞稷曰字清甫歙人宋昌化簿入元不仕

夏氏

良規

五經解

佚

林氏

洪範

五經義方

十卷

佚

閩書閩縣人

馬氏

廷鸞

六經集傳

佚

江西通志馬廷鸞字翔仲樂平人登進士歷拜右丞

相

王氏

應麟

六經天文編

宋志六卷

存

今本二卷

玉海藝文經解

九卷

存

應氏

翔孫

經傳蒙求

佚

方回序曰王伯厚尚書學極天下之博長予四歲予
昔嘗敬事之戴帥初博士學極天下之粹少余十七
歲今予畏友也此四明二先生俱以其里中應君子
翱翔孫所著經傳蒙求為然予無復容喙矣竊嘗謂
道一而已而物有萬古聖賢之學不專在語言文字

日月星辰與天為體運而不已山川草木與地為體
生而不窮言語文字與聖賢為體傳而不朽體物也
所以用之者道也道不離物易究咎休書紀治亂詩
美刺春秋褒貶三禮辨上下論專言仁孟兼言義皆
以語言文字與道為體其妙用所在一而已一者何
道是也然則何道也天地之心耳此之謂道而以其
道用乎日月星辰山川草木之物故曰道不離物聖
賢之心欲使千萬世之人為善不為惡以復其有善

無惡之性則不容不著之書此言語文字所以為斯
道有形之體而無形之道所以用乎有形之體而寓
於言語文字之中也顧可忽諸子翱所謂蒙求自易
至論孟皆括為韻語以訓後進旁及諸子百家而揚
雄方州邵家之書亦與焉予曩亦嘗摘其奇語難字
以供刀筆艱深之中輻平易亦不過一陰一陽一晝
一夜一寒一暑消息往來幽明生死之故易之注疏
也獨所用六日七分歷法一歲則易之一端耳康節

經世書出於此或謂予好太玄又出雲覆甌下回曰
不然凡言語文字之不畔於道者皆與道為體片雲
起於天而澤四海粒粟根於地而飽萬民一畫肇於
聖人而開百聖天地聖人之道皆託於物近世有欲
滅絕言語文字以為學者敢痛詆朱文公著述謂率
多於古人動累於後來黨陸也其人臨汀使君不滿
五十而死天棄之矣讀予翱之書者亦曰與道為體
能於有形中求無形則將於無味中得有味矣予翱

早中童子科伯公衡嘗叅大政云

馬氏端臨經籍考

七十六卷

存

胡氏仲雲六經蠹測

佚

王氏義端經疑

十五篇

佚

程鉅夫表墓曰義端字元剛受易於廬陵歐陽守道
與兄義山俱有名以恩監江陵白水鎮遷武岡綏寧
令文丞相起兵江西辟與幕議君歎曰事已至此去
將安歸涕泣謝之自是終其身不出或勸君仕曰我
不能死可復仕乎

陸氏

正

七經補注

佚

浙江通志陸正字行正海鹽人

今屬平湖

舊名唐輔宋亡

與族父霆龍以家世宋臣矢不仕元遂更名正程文
海薦之不起後復與劉因同徵堅不赴隱居教授及
卒門人私謚曰靖獻先生立書院於陳山祀之

鄭氏

君老

五經解疑

佚

姓譜字邦壽長溪人咸淳四年進士元初交薦不起
學者私謚曰靖節先生

張氏

卿弼

六經精義

百卷

佚

虞集曰弋陽張君卿弼字希契登咸淳戊辰進士第除福州司戶辟充教授仕至興化倅而宋亡隱居不出門生弟子從受業者甚衆講學藍山書院徧取傳記百十家擇其合於脩己之學而不墮於清虛治人
之方而不雜於術數者輯而錄之名曰六經精義凡

數百卷

謝氏

枋得

五經珍抄

四卷

存

陸元輔曰疊山五經類纂四卷坊間所刊盱江趙師
聖序之題曰珍抄

王氏

所

五經類編

二十五卷

佚

台州府志王所字喻叔黃巖人咸淳乙丑進士宋亡致高郵軍事歸營書院於漢濱及卒黃超然題其墓曰宋進士元逸民南峯王公墓

牟氏 嘯 六經音考

佚

鄭元慶曰嘯字獻甫子才之子也以蔭歷大理少卿宋亡不仕與子應龍父子討論著六經音考

余氏 浙 六經審問

佚

紹興府志余浙字季淵新昌人登進士歷監察御史
改大理少卿歸自號致曲老人

趙氏 元輔 六經圖

五卷

未見

黃氏 澄 五經通略

二卷

未見

顏氏宗道經說

一卷

未見

申氏似慶五經論

佚

似慶自序曰五經聖人成書萬世標準聖人既沒遭

秦之亂禁網嚴密天下學士逃難結舌以書為諱天下無全書矣漢除煩苛約以三章更高惠二君挾書著律猶未盡去老壯者沒少者亦耄期矣未必盡能記誦也伏生年過九十始克口授不全之書他經不至於泯絕者漢儒補葺之力為多今讀其書者知漢儒記誦傳習之艱苦而默會聖心於千萬世之上可也作五經論

謝鐸曰五經論黃巖車隘軒似慶著今有抄本

俞氏瑛經傳考注

未見

趙氏孟至九經音釋

九卷

未見

鄭元慶曰孟至宋燕懿王後祖希懌自青田徙湖州

父與憲嘉定中登第孟至咸淳乙丑進士官運判

趙氏德五經辨疑

未見

江西通志趙德宋宗室自號鐵峰博學工文隱居郡城之東湖

按趙氏辨疑惟毛詩有二十八則附朱倬疑問之後餘俱未見

葉氏

夢

經史子要

未見

黃虞稷曰建安人入元不仕

張氏沂辨經正義

七卷

佚

俞氏

酉發

經傳補遺

三十卷

佚

鎮江府志俞酉發字明叔德鄰之弟咸淳中以明經
試太學後隱居不仕

陳氏晉六經講義

佚

周氏

明辨

五經手判

宋志六卷

佚

亡名氏授經圖

宋志三卷

佚

崇文總目不著撰人名氏叙易詩書禮春秋三家論語孝經之學師承相第系而為圖

魚講書

宋志五卷

佚

九經要畧

宋志一卷

佚

六經疑難

宋志十四卷

佚

九經經旨策義

宋志九卷

佚

六經奧論

六卷

存

黎溫序曰經以載道先儒言之備矣蓋易以究陰陽
書以道政事詩以理性情春秋以明褒貶禮以謹節
文樂以致中和故潔靜精微易教也疏通知遠書教
也溫柔敦厚詩教也屬辭比事春秋教也恭儉莊敬
禮教也廣博易良樂教也是以聖人作經垂訓之功
不亦大乎昔者周衰六經厄於秦火漢室奮興始除
挾書之律經籍漸出諸儒傳於殘編斷簡之中山巖


屋壁之內晉唐以來莫有發揮迨乎宋德隆盛五星
聚奎文運先啓治教休明而應生於濂洛關閩之羣
哲於是諸經皆有傳義之說如日麗中天聖道不顯
而頓回鄒魯洙泗之風教粵若夾漈鄭先生名樵字
漁仲莆陽人亦出於宋隆平之世典教之際述作是
書而為六經管轄之論啟其關鍵闡發幽祕俾學者
直睹升堂之精蘊是則有功於聖門誠不鮮矣溫自
往年遊於盱郡常請益於灣溪子由危先生講論之

暇出家藏厥祖訓導邦輔所錄是書啟誨於溫既而
舊冬遂請是橐敬攜入於書林一旦訪謁日新劉氏
克常細閱其義欣然珍留擊節歎曰滄海誠有遺珠
矣而請余校正之予竊謂是書一出則六經之奧昭
然不惟天下學者之有幸也

按世傳六經輿論六卷成化中盱江危邦輔
藏本黎溫序而行之云是鄭漁仲所著荆川
唐氏輯裨編從之今觀其書議論與通志略

不合漁仲嘗上書曰十年為經旨之學以其
所得者作書考作書辨譌作詩傳作詩辨妄
作春秋考作諸經序作刊繆正俗跋五六年
為天文地理蟲魚草木之學所得者作春秋
列國圖作爾雅注作詩名物志而輿論曾未
之及則非漁仲所著審矣

經義考卷二百四十五



總校官庶吉士臣侍朝

校對官庶吉士臣何思鈞

謄錄監生臣劉垠